

■5位女神送飛吻，林盛斌開心到震。



無綫戀愛真人騷《女神配對計劃》自播出後話題不絕，昨日5位女神與一眾「求愛勇者」出席活動時，亦「花生」指數爆燈！曾展望幸運被抽中抱起葉蒨文，即惹來參賽者林堡熙(Eddie)呷醋怒脾，更說：「睇住整親呀！」火藥味非常之濃。



■關嘉敏直認對姜卓文心動。

關嘉敏認情傾姜卓文

曾展望抱葉蒨文 林堡熙呷醋怒脾

葉蒨文(Sophie)、羅毓儀(Yuki)、李芷晴、關嘉敏、梁敏巧昨日到將軍澳電視城，出席《女神配對計劃》記者會，一眾「求愛勇者」與女神大玩心動遊戲。Yuki應主持林盛斌要求，向林俊其撒嬌，但她卻尷尬得只懂傻笑，最後變成林俊其唱歌哄女。姜卓文唱情歌哄關嘉敏，哄到女方怕醜面紅紅。曾展望被抽中與Sophie「公主抱」，其他女神即起哄質疑作弊。當他抱起Sophie時，Eddie醋意大發，怒脾曾展望並說：「睇住整親呀！」

Sophie受訪時被問是否已選定曾展望？她笑言：「愛情係持久戰，我哋5個都好認真，唔會欺騙人感情，亦都唔想Hurt人。」曾展望表示不覺得藝人身份對追求女神有優勢：「雖然有信心成功，但感情唔可以只靠信心，要睇大家來唔來。」

關嘉敏與姜卓文、黃家俊玩遊戲，明顯較喜歡姜卓文。記者取笑她變成女追男，她笑言：「我個人都有乜好驚，得番個膽，其實我係咪入錯節目？無論單身定係拍拖都係靠自己。」她直認對姜卓文比較心動，但了解後發現黃家俊也很好，可能陷入三角戀。

梁敏巧：Auntie都有市場

李芷晴於節目拒愛周嘉全，被觀眾批絕情。她說：「我同周嘉全識咗7

年，冇心動過，相信以後都唔會，唔想浪費大家時間。但我最擔心會失去呢位朋友，慶幸都能夠保持友誼。」

梁敏巧於節目「零秒熄燈」拒愛63歲求愛勇者，以及送網紅Babyface出局，被網民指拜金。她表示多謝網民瘋狂轉貼其「醜樣相」：「如果有人搵我工作，酬勞OK嘅話，我素顏出鏡都可以。」對於林作取笑她是「Auntieface」，梁敏巧笑言：「Auntie都有市場，我之前啲男朋友都唔係才俊，最重要相處有安全感。」



■羅毓儀與林俊其合照時「硬晒軟」。



■曾展望有幸抱起葉蒨文，身後的林堡熙一臉不悅。

高海寧濕疹未癒 擬放大假休養

高海寧、周嘉洛和黃庭鋒昨日出席活動宣傳旅遊節目《GRAND住去利物浦》，高海寧笑言拍攝每天都很難忘，最深印象是在球場頂玩游繩：「我本身畏高，相信經過今次之後都克服咗，因為真係好大風，吹到成個人搖。」

提到日前她自爆濕疹入眼，高海寧說：「濕疹問題困擾咗我好耐，睇過中西醫都未根治到，加上之前生眼挑針同發炎，依家都唔敢化眼妝，最擔心係影響拍劇進度。」她坦言對自己工作很高要求，故一直累積壓力，加上多年沒放假休息，打算拍完手頭上兩部劇集，便放假調理身體。

提到緋聞舊愛鄧智偉化濃妝上央視備受熱議，她坦言沒有留意：「依家我眼有事要好好休息，冇留意新聞，甚至手機都睇少咗，有時間用嚟睇劇本好過。」



■左起：黃庭鋒、高海寧與周嘉洛穿上利物浦波衫出席活動。

Hey Brother拍MV餵蚊

由李思捷、黃智賢、麥長青、曹永廉與唐文龍組成的男子組合Hey Brother，即將推出新歌《共唱輝煌》。日前他們拍MV，為了捕捉旭日初升的畫面，5人凌晨時分出發到西貢進行外景拍攝，身水身汗兼餵蚊！麥長青稱很久沒接受「03」通告，令他憶起多年前在無綫拍古裝劇的日子：「以前成日嚟呢度拍古裝劇，當時嘅路未整好，我哋要着古裝行半個鐘，夏天真係一身汗，唔知道後生時點解咁捱得，依家要我行，真係頂唔順。不過好開心可以幾兄弟一齊咁早起身拍攝，企足一朝早，曬到皮膚變黑。」



■左起：李思捷、麥長青、唐文龍、黃智賢與曹永廉組男團Hey Brother。